

惜抱軒集

惜抱軒文後集六

碑文

光祿大夫東閣大學士王文端公神道碑文 并序

公諱杰字偉人王氏先世居山西洪洞遷陝西韓城居五世至石門縣王簿諱廷昭公之考也以公貴贈光祿大夫東閣大學士公妣吳太夫人生三子長藩仲澈公為季端凝好學見於幼稚長以拔貢生得教諭未任遭父喪服終貧甚為書記以養母所居幕府尹文端公繼善陳文恭公宏謀之為江南督府時也兩公皆名知人而最賢公謂為正士乾隆庚辰恩科中鄉試次年恩科中會試殿試讀卷官進三第

三 純皇帝親拔為第一引見風度凝然上益喜授翰林院修撰由修

撰四轉得詹事府少詹事日講起居注官直南書房旋晉內閣學士歷工刑禮吏

四部侍郎都察院左都御史母喪回籍在籍擢兵部尚書詔服闋赴職充經

筵講官賜紫禁城騎馬為上書房師傅直軍機處乾隆五十一年正月拜東

閣大學士公為人廉靜質直誠於奉職其居位與和坤同列公以大體接之不為壯

頡倬倬之事而遇所當執終不與和坤附公素行無疵瑕純皇帝知公最深和坤

雖厭公亦不能去也如是數年及令上臨政公意益得發摠矣然公嘗念大臣

所當為者非盡於所能言獨居意嘗邑邑深念而不怡蓋公之心人必不能具識而至其入陳 禁陞裨益朝廷者又非人所得聞故不可得而述也嘉慶七年公以老病乞休 詔予在籍食俸加太子太傅 御製詩送之有云直道一身立廊廟清風兩袖返韓城足以盡公生平矣嘉慶九年公與夫人八十歲又有 御詩及頒賜諸物公季冬入都謝 恩留至十年正月十日薨於京邸 命榮親王奠醑 賜銀二千兩治喪又 賜祭葬贈太子太師祀賢良祠諡曰文端公為乾隆庚戌科會試總裁官又嘗為湖南江西浙江考官一督福建學政三督浙江學政所進多佳士其于門下士相愛甚篤然未嘗少涉私引教之必為君子而已夫人程氏四子主事堦時監生埈時武選員外郎埈時廩膳埦時孫九子公葬於韓城北原生既立神道之碑乃刻銘曰

科第士首爵位朝碩德器優優以居無忤大臣之度遠思邈邈去名釋功匪惟以激事賴其休物被其澤惟其志宏艱而不懌 天子知之降予載赫著厥儀形 紫光之閣顧思德音公逝弗作過墓思敬瞻此穹石

吏部左侍郎譚公神道碑文

并序

公諱尚忠字因夏南豐譚氏其先世多聞人矣及公成乾隆辛未科進士授戶部主

事三徙為山西道監察御史出為福建興泉道又入為刑部員外郎再出為廣東高廉道三遷至安徽巡撫降福建按察使再遷至雲南巡撫入為刑部右侍郎調吏部左侍郎嘉慶二年十一月二十八日薨于位公之在戶部也嘗司寶泉局及

高

宗純皇帝察局中事惟公無纖豪私染在興泉時以洋行事例降官

上又察知

其不汙故復進用其在封疆為大吏室中澹泊寒士過屬員甚有禮藹然親也獨不能少入之以財利天下論吏清儉者必舉譚公為首然公遇事奮發則執誼不可回其為安徽巡撫以忤和坤致降為福建按察使在福建復屢以事與督撫爭至督撫同官事尤相牽而為撫者每委曲以就督公在雲南獨能持正裁之且謂曰公自為其德吾自任其怨可也其丰采峻厲如此故公雖和平廉潔而非煦煦曲謹者也其教子有曰人當先約其身身約則心約心約則事不踰閑然後可以擴充為有本之事功矣故公所至興利去害必究其原委曲折之盡則斷然行之使所蒞必蒙其澤而後已去則民多涕泣送之

高宗純皇帝嘗稱為正人可任事

今上亦絕

重之而公遽沒矣公在安徽姚鼐主敬敷書院時接談讌食設五器而情厚有餘及聞公薨而悲令又十年矣公子光祥以庶吉士改禮部主事自京師移書至曰先公既葬矣而碑未立某夙奉公教宜為文至其家世及夫人子姪之詳則編修陳用光

誌之矣故不具銘曰

公居士林文學惜惜接物以情不為阻滌秉節當官蔑敢私干進者宜之退者弗怨
歷通及遐隴坻海嶠攘袂姦蠹耆孺鼓樂晚為侍從公望在衆殂未及登刊石載頌
墓表

中憲大夫保正清河道朱公墓表

公諱濶字問源其先吳人顧氏也明天啓時有以義憤擊魏闖所使緹騎逮周順昌
者避匿江甯自是為江甯朱氏 國朝始為江甯學生者曰應昌生贈編修圻贈編
修生康熙己丑科進士翰林院編修元英編修生江甯學貢生贈通議大夫松年嘗
舉孝廉方正不就早卒公之考也公生八歲而孤家貧身弱妣舒太夫人苦節撫而
教之稍長即遊幕於外以供養蜀楚閩徽無不至於民情美惡政教利病無不曉卒
在直隸通水道幕為總督方恪敏公所知保舉以從九品職引 見發河工補楊邨
主簿值漕船起撥運丁有多奪小船以病衆者公往數語諭之即服公名自是起歷
縣丞知獻縣河間縣務關同知務關治河官也公治運河有績而上官惡之以報水
遲解其職會有大臣出勘河患乃保留公公始以水漲患民田廬請上官修治為斤
拒至是陳於使者功舉畿輔民獲甯焉逾年授天津府同知卓異擢正定府知府再

擢清河道公在道職凡五年而五署按察使方公之為知縣所臨案無留牘屢以平反冤獄稱明允於直隸矣及攝臬司尤以獄為重每屬吏所不能決公親研鞫或晝夜據案披訊經月不輟所定必當罪全無辜者甚衆又為獄四疾設隔別之法令無傳染籌得歲千餘金為獄中新炭醫藥之費至今為利歲饑總理賑救勤察無遺濫值 高宗純皇帝至趙北口 召公見於行幄時以水災請蠲魚葦課 上問

魚葦宜水者而亦蠲何耶公曰水小則魚聚葦生大則魚溢出而葦沒爛 上大

稱善又詢數事皆稱旨將大用之矣而以審案稽遲去職公之四攝臬司也為日淺甚有盜案在保定府未定上其後盜發他省供首盜在保定而未究出 上怒自

總督以下皆得過方以法繩下雖知公在職暫不特宥也久之乃 賜復原銜既又

令總督過相當缺出題補然公久勞於官致憊自以老疾乞歸不能仕矣時乾隆五十六年也 上後猶數問其疾愈否公竟於嘉慶元年九月十九日卒於江甯里

中年七十三公生平嚴持清節而施人則甚厚仕歸資業蕭然嘗著才識論謂處事以識為主而才副之不可偏廢不得已而去甯無才不可無識故其立身治民必求其大者要者云所著待潮書屋存稿四卷又詩三卷待潮雜識二卷厯官紀要二卷夫人陳氏誥封恭人生子三紹曾安徽布政使賢仰早卒續曾靈州知州側室于氏

生子三顯曾候選縣丞述曾承曾俱候選從九孫七桂棟候選同知桂楨已未進士
文選司主事桂馨桂森桂柱桂樞桂楹女十一人孫女十人公與夫人合葬於江甯
桐城姚鼎為之阡表云

修職郎碭山縣教諭瞿君墓表

君諱塘字澂川嘉定人有文學為王光祿鳴盛門人光祿稱之以商籍為錢塘學生
由廩貢得教諭嘗署浙之嘉定甯波溫安學官矣卒改歸本籍乃為碭山教諭奉上
官檄察邳州水災君不避勞苦所察得實既又值旱災君察之亦然民被灾多賴以
存者父艱歸服終署昭文元和金壇學官所至皆為諸生所親樂然君厭塵事遂謝
病不復出託居蘇州閭門之北君為人篤謹和易未嘗有疾言厲色於鄉里遭喪以
毀得疾數年遂習為導引通道家之說夜長不寐年六十嘉慶九年坐而遊妻諸孺
人賢恭稱君配生子中浩中溶先君九年卒嘉慶十年合葬長洲之天森山側室周
氏生子中淦中濟中溶娶錢少詹事大昕之女嘗見鼎於江甯令葬君以王侍郎昶
之銘寄示余於懷甯余擬其要以表其墓

姚休那先生墓表

休那先生之先世自婺源遷桐城白岑里是為白岑姚氏居九世曰一還為諸生而

早卒妻吳氏為節婦子士晉士晉後改名康而字休那焉為明諸生有雋才高識而
屈於場屋里中何文端延之入都文端為吳江周忠愍宗建墓誌為世稱其文史家
今據以為傳出先生手也文端告歸後數年被召又邀先生同行先生知世不可為
嘗題卧猿詩以諷之文端遂稱病而反先生後入史相國幕中故史公檄文多為世
稱然先生旋歸里得免揚州之難改革之後屏居田野鬱邑悲傷作忍死錄以記其
家自曾祖以下四世事其言最悲痛平生文字為人作與自為者相半凡十餘卷藏
於家惟評貨殖傳黃巢傳刻傳於世順治十年卒年七十六先生存時史相國為豫
題墓曰明讀書人姚康之墓卒後百五十年同里姚鼎述其生平表於碣云

石屏羅君墓表

石屏羅君諱會恩字際叔宗人府丞諱鳳彩之孫隴西知縣諱元琦之子有文學數
不第退居修行於家其事父母盡孝養之誠父歿使婦侍母寢數年母終免喪而後
婦復君乾隆戊子科舉人也吏部選為安甯州學正君不忍離母竟不就官其兩執
喪皆能如禮有兩兄兩弟以事以撫能恭以愛其遇族里誠且直責人言或至切而
人感其意不為怨也里中事宜謀於公所君卓然建議躬任其勞必衆利而後已其
身終於鄉而人信其才足以任世事也嗚乎士溺於俗久矣讀古人之書聞古人之

行事意未嘗不是之而及其行事顧憚不能效也如羅君可謂勇於為而不負其學者已君嘉慶九年卒葬於懷甯之
江濬源銘之逾二年桐城姚鼐為書其生平之概俾其弟覲恩揭諸墓上云

婺源洪氏節母江孺人墓表

江孺人婺源江某之女為洪永禧之妻永禧家貧甚勤耕薄田未明而興逾昏而息孺人歡然共其勞有子三于一歲殞其二永禧痛之甚亦亡孺人獨撫六歲仲子立登於田間殆無以為生矣於是晝督傭客夜執針黹茹苦積瘁以至子立登之長出賈乃稍有贏孺人顧好賙恤有負其財者念其貧憊棄券而復資之而自奉則儉不欲適田家時有孫鈞自幼餐宿皆依其側長則督之學立登後居於江甯鈞亦來江甯從余學為余言孺人所以訓之者率如古賢母言而孺人目不知書其貞哲天性然也孺人亡年七十有五其喪夫時逾三十於例不應旌表余嘗論女子夫亡守志有未三十而守猶易有逾三十而守倍難者例有定而人所遭不可定也孺人之執節可謂難矣因書其實俾鈞刻諸墓上云嘉慶十一年秋七月桐城姚鼐表

臧和貴墓表

武進臧氏有孝子曰禮堂字和貴家貧無僕役躬執薪水之事以事父母能盡愛養

父病瘧畏寒惡火和貴每夕身溫其被父喪三日不食三年不入內如禮母疾割股
禱而母愈其初娶也懼婦不能孝其親作七言辭以教婦婦至使人抗聲誦俾立聽
畢而後合卺苟有益於親之事必忘身而為之也苟足悅其親雖違衆不顧也和貴
與兄庸皆好學博聞尤精小學善讐校為四方賢士所貴而和貴不幸年三十而死
桐城姚鼐嘗識庸聞和貴之學行未見也今以天下悲惜和貴之情乃為表其墓云

姚氏長嶺阡表

姚氏自餘姚遷桐城始遷曰勝三公勝三公後四世以農田為業五世為明雲南布
政司右參政諱旭有政績而貧參政卒子孫復修農田三世皆有隱德參政四世孫
諱自虞為諸生其子諱之蘭為汀州府知府加按察副使銜所歷海澄縣杭州汀州
二府民皆為祠以祀參政副使仕績明史皆載入循吏傳副使之子諱孫棐仕為職
方主事職方之子文然仕國朝康熙時以刑部尚書終諡曰端恪至世宗時

追論先朝名臣思其賢詔特祠春秋祀焉祠今在城東門內端恪公之第四子諱士
基以舉人為羅田縣知縣羅田民以奉入名宦祠羅田府君之次子是為贈編修公
鼐之祖也年二十六而卒配任太恭人賢孝秉節上奉姑下教二子長子為翰林院
編修諱範次子為贈禮部員外郎諱淑鼐之考也贈編修公承累世賢哲之遺風敦

行勤學而不幸無年編修府君既孤憤發策勵外友天下賢俊以相資長為詩古文辭故同里則劉才甫山陰則胡稚威常熟則邵叔向皆編修所尤厚也而編修自沈究遺經綜括先儒茹精晰微萃成已得然仕為翰林數歲不究其用而歸歸著書亦未及竟而卒此天下士所共為歎惜者也當端恪公薨羅田府君買得墓地居長嶺之巔去城七十里將葬端恪而薈從子以為遠僻不用乃別葬後羅田府君卒亦別葬羅田長子中書公與贈編修公相繼沒矣而故買長嶺之山其契藏族君子來安訓導文默之笥吾家不知也有謀葬地就來安求售來安不許然後吾家得聞任太恭人乃命編修兄弟奉中書及贈編修公合葬於此山雍正之六年也又其後編修公沒未葬任太恭公及叢父贈禮部公皆別葬矣叢與伯兄昭字乃奉編修及伯母張太宜人合葬贈編修墓下之右其時叢繼妻張宜人亦未葬又葬於編修張太宜人塚右時乾隆五十二年也故姚氏之阡為塚三而有五柩焉自是後又二十年贈編修公諸孫盡喪獨叢存懼舊德遺事泯不聞乃謹書以列諸隧左中書公諱孔鏞字振修康熙三十九年舉人候選內閣中書舍人康熙四十九年卒年四十一娶廣德州學正方曾祐女生二子興漢興漢二孫漣支幹贈編修公諱孔鏌字瓊修縣學生康熙三十七年卒贈承德郎翰林院編修累贈朝議大夫禮部儀制司員外郎娶懷

甯任氏大理寺少卿諱奕鑾女生二子有八孫編修子曰縣學附貢生昭字南甯府同知義輪舉人登監生勳隆縣學增生斟元贈禮部子曰刑部廣東司郎中鼎候選州吏目訐副榜貢生鼎編修府君始名興凍令贈編修墓所列其舊名也後改名範乾隆七年進士改庶吉士授翰林院編修乾隆甲子科順天鄉試同考官三禮館纂修官乾隆十五年歸里乾隆三十六年卒年七十娶縣學生贈內閣侍讀張若霖女乾隆三十九年卒年七十四令合祔焉生子五鼎始娶張宜人卒繼娶張宜人乃前婦具五世祖妹也為屏山縣知縣張諱曾敏女其始權厝墓有銘矣茲不具

贈中憲大夫湖廣道兼掌河南道監察御史加二級孟公墓表

國家定制一品官封贈三代得及曾祖父母而有特令官未至一品而願以己及身及妻應得封典特乞貤加及曾祖父母者呈請部臣奏聞而詔命焉蓋所以伸人子孫追遠事亡之至情又以示士有積善者或遠或近期必蒙報於後世此又

聖朝錫福之廣所以勸天下之為善也乾隆五十三年

覃恩封贈諸臣之家而

太谷孟御史生蕙請以所應受之封貤及曾祖已故候選府經歷奉旨允給於是遂贈公中憲大夫湖廣道兼掌河南道監察御史加二級夫人趙氏贈太恭人公諱鴻品字飛陸其立身有行義事親尤孝謹愉色婉容能曲成親心其考邑庠優生旣亦

君子也母武孺人皆樂公之能養志公外接人無城府獎正疾邪而能有容其教子孫必為正士謂士品立則可富貴亦可貧賤士品一驟富貴則驕溢貧賤則卑污均為可恥公生於康熙十五年卒於雍正十一年年五十七後六年葬孟家莊東南原又後四十年而得贈官焉趙夫人年九十乾隆二十九年卒祔公墓子三人長熙邑庠生贈朝議大夫湖廣道監察御史次照次烈恩賜從九品鄉飲耆賓孫八人啓周贈中憲大夫工科給事中啓疆歲貢生汾陽縣教諭貽封奉政大夫順天府西路同知啓堂國學生贈文林郎清河縣知縣啓林啓域啓壑啓壩啓基曾孫十八人生黃贈中憲大夫生蕙乾隆癸未科進士歷官至通政司參議文蔚府經歷生革乾隆戊戌科進士順天府西路同知生蘭生葛庠生生藻生英從九品生萬生為生茂生芬生松生荃生康生傑生夔生度元孫以下人材滋起人謂公德之貽甚遠不享於其身而光於後嗣未有艾也鼎與公曾孫生蕙為同年友生蕙遺書令為阡表鼎愧不文顧以通家晚列仰望懿美國恩家慶皆可贊述因書所聞見以謂可為賢者慰矣

博山知縣武君墓表

乾隆五十七年當和坤秉政兼步軍統領遣提督番役至山東有所訶察其役攜徒

衆持兵刃於民間凌虐為暴歷數縣莫敢何問至青州博山縣方飲博恣肆知縣武君聞即捕之至庭不跪以牌示知縣曰吾提督差也君詰曰牌令汝合地方官捕盜汝來三日何不見吾且牌止差二人而率多徒何也即擒而杖之民皆為快而大吏大駭即以杖提督差役參奏副奏投和坤而番役例不當出京城和坤還其奏使易於是以致杖平民劾革武君職博山民老弱謁大府留君者千數卒不獲然和坤遂亦不使番役再出當時苟無武君阻之其役再歷數府縣為害未知所極也武君雖一令而功固及天下矣君諱億字虛谷偃師人乾隆四十五年進士其任博山縣及去官才七月而多善政民以其去流涕君自是居貧常於他縣主書院讀經史考証金石文多精論明義著書數百卷今 皇帝在藩邸聞君名及親政召君將用之而君先卒矣君卒以嘉慶四年十月二十九日年五十五余與君未及識第聞其行事讀所著述今遇君子穆瀉於江甯為文使歸揭諸墓上君行足稱者猶多而非關天下利害茲不著嘉慶十八年二月桐城姚鼐表

贈中憲大夫武陵趙君墓表

君諱宗海字匯川其先世居歙之巖鎮宋之宗室也有朝散郎不攸之裔孫字仲容者自歙遷於湖南為武陵人君之祖也君考曰商山早世君三歲而孤繼又喪母乳

媼哀而育之於家稍長出入里閭恭慎勤敏異於常人時武陵有王西崖妻劉安人寡居而賢知能鑑人生一子一女女聰慧過知古今書史劉安人奇之欲得良婿見趙君愛之曰此孤兒後必大乃以女女焉是為王太恭人也君遂為王氏贅壻治生為費然能敦信而輕利遠近服其為人所交多四方長者當趙氏來武陵猶有貲君考之亡族入皆侵取之君既立家顧厚於族人尤甚微弱者皆依以成立先世柩在歛未葬者君皆安葬之人有事就謀者必忠告而為盡力焉以積勞卒卒年四十時王太恭人年三十八君未沒時綢繆趙王兩姓皆立門戶子皆能讀書矣太恭人兄春埜為名諸生太恭人以子屬教之令觀察也及君喪太恭人督教子益嚴嘗杖子而杖折太恭人識歲月於折杖而藏之初君所受託以財賄者有數千金及君沒頗乏償貲或謀以孤寡辭而弗與太恭人曰吾夫信義故人託之令弗償是為夫取惡名也乃破產鬻室中衣物以盡償負其周恤族黨親故之事甚衆人謂君固賢而成君賢者亦內助也君與太恭人以子貴屢被國恩封贈而令觀察為編修時以己及妻應得之封貤贈外祖及劉安人云君之子二曰慎畛嘉慶丙辰科進士今為廣東惠潮道慎畛君與王太恭人合葬於

嘉慶十八年冬桐城姚鼎為之表

方母吳太夫人墓表

吳太夫人者吳縣人事太子太保直隸總督方恪敏公為側室而令尚書浙閩總督維甸之母也尚書生十一歲而孤歸居江甯或見其孤弱侵侮之太夫人置不與論而自刻勵勤苦彌甚教子極嚴不使稍有子弟之過嘗篝鐙治女紅而課子誦讀于側每至夜分及尚書長成進士登朝則日勉以道義忠敬之事而治家以勤以樸不改于初尚書或被使命出戀侍膝前雖行萬里磧外大夫人必正色責其速行急國事不得少佇遽既出門而為涕泣焉當恪敏公存時兩從子孤幼撫之身側太夫人愛誨之與己子無少異故令侍郎河南巡撫受囑嘗述於上前上聞為太息及太夫人亡而令持一月之服也其天性尤好聞人為善及有慶樂事則欣喜若在己苟力所及則必助之其有不善或憂苦則戚然不安者移時於舊怨則忘之而令子受以厚待既以子貴國恩得封太夫人而上稔知其賢屢加賜問嘉慶十八年卒于江甯里第年八十五上聞特使江甯將軍至宅祭之命婦加祭非常典以旌德也是歲十月甲子朔葬于句容北葆山恪敏公之西麓惟太夫人徽懿徹於九重惠澤洽於閭巷朝廷賴毓成之器室家奉先立之型核厥嘉休宜垂後世墓成之日桐城姚鼐述為之表

